



KOSOVO SPECIALIST CHAMBERS
DHOMAT E SPECIALIZUARA TË KOSOVËS
SPECIJALIZOVANA VEÇA KOSOVA

Numri i lëndës: KSC-BC-2020-06

**Prokurori i Specializuar kundër Hashim Thaçit, Kadri Veselit,
Rexhep Selimit dhe Jakup Krasniqit**

Vendosi: Trupi Gjykses II

Gjykatës Çarls L. Smith III, Kryegjykatës

Gjykatës Kristof Barte

Gjykatës Ginel Metro

Gjykatës Fergal Gejnor, gjykatës rezervë

Administratore: Fidelma Donlon

Data: 11 tetor 2024

Gjuha: Anglishte

Klasifikimi: Publik

**Vendim mbi Kërkesën e Prokurorisë për Dhënie të Dëshmisë nga W00344
përmes Videokonferencës**

Prokurores së Specializuar
Kimbërli P. Uest

Mbrojtjes së Hashim Thaçit
Luka Mishetiq

Mbrojtjes së Viktimave
Simon Loz

Mbrojtjes së Kadri Veselit
Rodni Dikson

Mbrojtjes së Rexhep Selimit
Xhefri Roberts

Mbrojtjes së Jakup Krasniqit
Venkatesvari Alagenda

TRUPI GJYKUES II ("Trupi Gjykues"), në bazë të neneve 21(2) dhe (4)(f), 23(1) dhe 40(2) të Ligjit nr. 05/L-053 për Dhomat e Specializuara dhe Zyrën e Prokurorit të Specializuar ("Ligji") dhe rregullave 141(1) dhe 144 të Rregullores së Procedurës dhe të Provave para Dhomave të Specializuara të Kosovës ("Rregullorja"), lëshon këtë vendim.

I. HISTORIKU PROCEDURAL DHE PARASHTRIMET

1. Më 25 shtator 2024, Zyra e Prokurorit të Specializuar (ZPS) dorëzoi kërkesën që Trupi Gjykues të autorizonte që dëshmia e W00344-ës të merret përmes lidhjes me videokonferencë nga një vend i përshtatshëm (Kërkesa).¹ ZPS-ja parashtron se dëshmia përmes videokonferencës: (i) është e nevojshme për të siguruar shëndetin dhe mirëqenien e dëshmitarit; dhe (ii) nuk do të cenonte në mënyrë të papërligjur të akuzuarit sepse Mbrojtja do të jetë në gjendje të marrë në pyetje dëshmitarin.² ZPS-ja gjithashtu parashtron se W00344 u njoftua si dëshmitar rezervë shtesë për bllokun e dëshmive 21 tetor - 7 nëntor 2024, gjë që kërkon disponueshmërinë e tij brenda një kohe të shkurtër dhe bën që data e dëshmisë së tij të jetë e varur nga ndryshime të paparashikuara në kalendar.³

2. Më 9 tetor 2024, Zyra Administrative dorëzoi vlerësimin mbi Kërkesën dhe konfirmoi mundësinë e realizimit të dhënies së dëshmisë së dëshmitarit në fjalë ("Vlerësim i Zyrës Administrative").⁴

3. Mbrojtja nuk u përgjigj.

¹ F02595, Prokurori i Specializuar, *Kërkesë e Prokurorisë për Dhënie të Dëshmisë nga W00344 përmes Videokonferencës*, 25 shtator 2024, konfidenciale, para. 1 (versioni i redaktuar publik u dorëzua më të njëjtën ditë, F02595/RED).

² Kërkesa, para. 1-2, 6-8.

³ Kërkesa, para. 5, 7.

⁴ F02631, Zyra Administrative, *Vlerësim i Zyrës Administrative lidhur me Kërkesën e Prokurorisë për Dhënie të Dëshmisë nga W00344 përmes Videokonferencës*, 9 tetor 2024, konfidenciale dhe *ex parte* (versioni i redaktuar konfidencial dorëzua më të njëjtën ditë, F02631/CONF/RED).

II. DISPOZITAT LIGJORE PËRKATËSE

4. Sipas rregullës 141(1), parimisht dëshmitarët e japin dëshminë duke qenë të pranishëm në gjyq. Trupi Gjykses mund të lejojë edhe që dëshmia e dëshmitarit të jepet përmes videokonferencës sipas rregullës 144 dhe në një mënyrë që nuk shkakton padrejtësi, apo që nuk është në mospërputhje me të drejtat e të akuzuarve.

5. Sipas rregullës 141(1) dhe (3) Trupi Gjykses mund të urdhërojë që dëshmia të jepet me videokonferencë me kusht që teknologjia të mundësojë që dëshmitari të pyetet si duhet. Trupi Gjykses garanton që videokonferenca t'u mundësojë palëve dhe trupit gjykses t'i bëjnë pyetje dëshmitarit gjatë dhënies së dëshmisë.

III. DISKUTIM

6. Trupi Gjykses rikujton se ka diskrecionin të autorizojë dhënien e dëshmisë nëpërmjet videokonferencës nëse plotësohen kushtet e rregullës 144, megjithëse prania e dëshmitarit në sallën e gjyqit mbetet zgjedhja e preferuar.⁵

7. Trupi Gjykses thekson se kur vlerësohet nëse duhet lejuar përdorimi i videokonferencës, mund të merren në shqyrtim disa faktorë, përfshirë: (i) vendi;

⁵ *Shih p.sh.*, F02396, Trupi Gjykses, *Vendim mbi Kërkesën e Prokurorisë për Dhënie të Dëshmisë nga W04445 dhe W04501 përmes Videokonferencës*, 20 qershor 2024, publik, para. 6; F02308, Trupi Gjykses, *Vendim mbi Kërkesën e Prokurorisë për Dhënie të Dëshmisë përmes Videokonferencës nga W04305 dhe Kërkesën lidhur me Të, 14 maj 2024, konfidenciale*, para. 8 (versioni i redaktuar publik u dorëzua më të njëjtën ditë, F02308/RED); F02181 Trupi Gjykses, *Vendim mbi Kërkesën e Prokurorisë për Dhënien e Dëshmisë nga W04571 nëpërmjet Videokonferencës*, 15 mars 2024, publik, para. 7; F01851, Trupi Gjykses, *Vendim mbi Kërkesën e Prokurorisë për Dëshmi përmes Videokonferencës për W04448-en dhe Çështje të lidhura me Të, 11 tetor 2023, para. 9* (versioni i redaktuar publik u dorëzua më të njëjtën ditë, F01851/RED); F01776, Trupi Gjykses, *Vendim mbi Kërkesën e Prokurorisë për Dhënien e Dëshmisë nga W03827 nëpërmjet Videokonferencës ("Vendimi i 8 Shtatorit 2023")*, 8 shtator 2023, konfidencial, para. 12 (versioni i redaktuar publik u dorëzua më 1 nëntor 2023, F01776/RED); KSC-BC-2020-07, Transkripti i Seancës, 14 janar 2022, f. 3034, rreshtat 2-5. *Shih gjithashtu ICTY, Prosecutor v. Tadić, IT-94-1-T, Trial Chamber II, [Decision on the Defence Motions to Summon and Protect Defence Witnesses, and on the Giving of Evidence by Video-Link](#), 25 June 1996, para. 19.*

(ii) gjendja vetjake dhe shëndetësore e dëshmitarit; (iii) disponueshmëria dhe siguria e dëshmitarit; dhe (iv) kompleksiteti dhe kohëzgjatja e çdo udhëtimi logjistik dhe përgatitjet e tjera që duhet të bëhen.⁶

8. Trupi Gjykues vë në dukje parashtrimet e ZPS-së se: (i) W00344 vuan nga një numër sëmundjesh serioze të detajuara në Kërkesën e ZPS-së;⁷ (ii) W00344 ka nevojë për ndihmë në jetën e tij të përditshme;⁸ (iii) kohëzgjatja e marrjes në pyetje të W00344-ës nuk parashikohet të jetë më tepër se një orë;⁹ dhe (iv) W00344 është njoftuar si dëshmitar rezervë.¹⁰

9. Trupi Gjykues gjithashtu vë në dukje vlerësimin e Zyrës Administrative se është e realizueshme dhënia e dëshmisë së W00344-ës përmes videokonferencës nga vendi i përshtatshëm me përgatitjet e nevojshme logjistike, teknike dhe të sigurisë, përfshirë zbatimin e masave mbrojtëse në sallën e gjyqit.¹¹

10. Pas shqyrtimit të kujdesshëm të Kërkesës dhe pasi ka vërejtur mungesën e kundërshtimit nga ana e Mbrojtjes, Trupi Gjykues është bindur se ZPS-ja ka vërtetuar që gjendja shëndetësore e dëshmitarit përligj dhënien e dëshmisë së tij me videokonferencë. Megjithatë statusi si rezervë i dëshmitarit nuk përbën në vetvete arsye për të pranuar kërkesën e dëshmisë përmes videokonferencës, Trupi Gjykues gjykon se në rrethanat për të cilat bëhet fjalë, duke pasur parasysh gjendjen shëndetësore të W00344-ës, videokonferenca është më e favorshme për mirëqenien e W00344-ës dhe krijon mundësi për fleksibilitetin në planifikim që kërkohet për dëshmitarët rezervë. Gjithashtu Trupi Gjykues gjykon se marrja e

⁶ Vendimi i 8 Shtatorit 2023, para. 12; KSC-BC-2020-07, Transkripti i Seancës, 14 janar 2022, f. 3034, rreshtat 6-10. *Shih ngjashëm* KSC-BC-2020-04, F00482/RED, Trupi Gjykues I, *Version i Redaktuar Publik i Vendimit mbi Kërkesën e Prokurorit të Specializuar për Dëshmi përmes Videokonferencës për TW4-04-ën, TW4-10-n dhe TW4-11-shin*, 13 prill 2023, para. 13-14.

⁷ Kërkesa, para. 6.

⁸ Kërkesa, para. 6.

⁹ Kërkesa, para. 9.

¹⁰ Kërkesa, para. 2.

¹¹ Vlerësimi i Zyrës Administrative, para. 7-16.

dëshmisë së dëshmitarit përmes videokonferencës mund të ndihmojë në shpejtimin e procesit.

11. Trupi Gjykses është bindur se dhënia e dëshmisë së W00344-ës përmes videokonferencës nuk do t'u shkaktojë dëm të akuzuarve dhe është në përputhje me mbrojtjen e efektshme të të drejtave të tyre, duke qenë se W00344 do të merret në pyetje në kushte të njëjta si të ishte në sallën e gjyqit. Konkretisht Trupi Gjykses, të akuzuarit, palët dhe pjesëmarrësit do të jenë në gjendje të shohin dhe të dëgjojnë dëshmitarin duke dhënë dëshmi drejtpërdrejt dhe do të kenë mundësi t'i bëjnë pyetje atij.

12. Rrjedhimisht, Trupi Gjykses miraton kërkesën e ZPS-së dhe autorizon që dëshmia e W00344-ës të jepet përmes videokonferencës.

IV. KLASIFIKIMI

13. Trupi Gjykses vëren se Vlerësimi i Zyrës Administrative u dorëzua si konfidencial dhe *ex parte* dhe se versioni konfidencial i redaktuar u dorëzua më të njëjtën ditë. Rrjedhimisht Trupi Gjykses urdhëron Zyrën Administrative të kërkojë riklasifikim dhe të dorëzojë versionin publik të redaktuar të Vlerësimit të Zyrës Administrative jo më vonë se të hënën, 21 tetor 2024.

V. VENDIM

14. Bazuar në arsyet e lartpërmendura, Trupi Gjykses:

- a) **MIRATON** Kërkesën;
- b) **AUTORIZON** W00344-ën të japë dëshmi përmes videokonferencës;
- c) **URDHËRON** Zyrën Administrative të bëjë përgatitjet e nevojshme për dhënien e dëshmisë së W00344-ës përmes videokonferencës; dhe

URDHËRON Zyrën Administrative të dorëzojë versionin e redaktuar publik të Vlerësimit të Zyrës Administrative jo më vonë se të hënën, 21 tetor 2024.

/nënshkrimi/

Gjykatës Çarls L. Smith, III
Kryegjykatës

E premte, 11 tetor 2024

Në Hagë, Holandë.